

KERANGKA KAJIAN AJARAN SESAT MENURUT AHLI SUNAH WALJAMAAH

Framework for the Study of Heresy According to Ahl al-Sunnah wa al-Jamā'ah

Wan Haslan Khairuddin*

ABSTRACT

This article discusses the framework for the study of heresy according to Ahl al-Sunnah wa al-Jamā'ah. The main issues discussed in this article are: [i] the definition, history and issues of heresy; [ii] the thoughts of Ahl al-Sunnah wa al-Jamā'ah; and [iii] the study of heresy according to Ahl al-Sunnah wa al-Jamā'ah scholars. The writing of this article is based on a qualitative study with the application of content analysis methods into Islamic texts and the works of Ahl al-Sunnah wa al-Jamā'ah scholars in the field of Usuluddin. The primary sources that form the basis of this writing are the works of Usul al-Dīn or 'Ilm al-Kalām that related to the study of al-Firaq al-Islāmiyyah (Ideologies of Islamic Thought). In conclusion, 'Ilm al-Kalām with the framework thought of Ahl al-Sunnah wa al-Jamā'ah is a mechanism in preserving the purity of Islam from any deviation, misguidance and disbelief. Expertise in the study of heresy, religions and ideologies requires individuals to have exposure to particularly in 'Ilm al-Kalām and the fields of Usul al-Dīn Studies in general. Neglect of relevant areas can lead to confusion in the formulation of a study, discussion, and debate.

* Senior Lecturer, Research Centre for Theology and Philosophy, Faculty of Islamic Studies, National University of Malaysia (UKM), 43600 UKM Bangi, Selangor, Malaysia. wanhaslan@ukm.edu.my

Keywords: *Ahl al-Sunnah wa al-Jamā'ah, al-Ashā'irah, 'Ilm al-Kalām, Heretics, Heresy*

PENDAHULUAN

Isu ajaran dan amalan sesat bukan satu perkara baharu bahkan sejarahnya sejajar dengan kewujudan umat manusia sejak pengutusan Nabi Adam AS.¹ Iblis berikrar mengelokkan segala jenis maksiat ke atas Adam serta zuriatnya selain menghalangi mereka daripada menjalani jalan yang lurus². Jenis-jenis penyelewengan, kesesatan dan kekufuran berterusan berlaku dengan dorongan Iblis.³ Hukum alam atau *sunatullah* memperlihatkan pertembungan antara hak dengan batil atau kebenaran dengan kesesatan berterusan berlaku sepanjang zaman. Seruan dakwah Islam dengan pengutusan para nabi serta rasul yang bergantian hakikatnya bertujuan mengembalikan manusia daripada kesesatan kepada kebenaran dan daripada mensyirikkan Allah SWT kepada mentauhidkan-Nya.⁴ Fenomena fahaman dan ajaran sesat wujud sejak berzaman dengan pelbagai dakwaan seperti mendakwa dirinya tuhan,⁵ atau wakil tuhan kepada segala agama, nabi, pengganti nabi yang memiliki kuasa merubah hukum hakam dan sebagainya.⁶ Ajaran sesat dahulunya bergerak tanpa disedari menyebabkannya sukar dikesan dan dibanteras. Dunia globalisasi tanpa sempadan serta teknologi masa kini menyebabkannya lebih mudah disebarkan dan sukar dibanteras pihak berkuasa agama. Ajaran sesat adalah barah yang mengakibatkan rosaknya aspek kepercayaan (Iman), pengamalan (Islam) dan kerohanian (Ihsan) seorang Muslim.

Di Malaysia, ilmu kajian ajaran sesat dipopularkan sebagai sebuah kursus khas mulai tahun 1980-an oleh Abdulfatah Haron Ibrahim. Hakikatnya, isu-isu berkaitan kajian sesat sudah dibicarakan ilmuwan Ahli Sunah Waljamaah (ASWJ) khususnya ulama Ilmu Tauhid atau ahli kalam. Signifikannya merujuk pentingnya seorang Muslim

¹ Lihat: *Al-A'rāf* 7: 27; *Taha* 20: 117.

² Lihat: *Al-A'rāf* 7: 16, *al-Hijr* 16: 39.

³ Lihat: *Al-Nisā'* 4: 119; *al-A'rāf* 7: 14; *al-Hijr* 16: 36; *Ṣad* 38: 79.

⁴ *Al-Naḥl* 16: 36.

⁵ *Al-Nāzi'āt* 79: 24.

⁶ *Al-Tawbah* 9: 31.

memahami sebaiknya isu-isu perbahasan Ilmu Tauhid. Justeru al-Quran bukan sahaja mengambil berat menjelaskan persoalan Tauhid sebagaimana surah *al-Ikhlāṣ* 112 tetapi menjelaskan sama persoalan syirik sebagaimana *al-Mā'idah* 5: 17; 72 & 73. Rujukan klasik teras kajian ajaran sesat antaranya karya Abū al-Ḥasan al-Ash'arī (m.324H),⁷ Abū al-Ḥusayn al-Maltī (m.377H),⁸ Abū Mansūr al-Baghdādī (m.429H),⁹ Abū al-Muzaffar al-Isfarāyīnī (m.471H),¹⁰ Abū Ḥamid al-Ghazālī (m.505H/1111M)¹¹ dan Muḥammad ibn 'Abd al-Karīm al-Shahrastānī (m.548H/1153M).¹² Antara ilmuwan Malaysia yang menghasilkan karya dalam bidang Abdulfatah Haron Ibrahim,¹³ Abdul

⁷ Abū al-Ḥasan 'Alī bin Ismā'īl Al-Ash'arī, *Maqālāt al-Islāmiyyīn wa Ikhlāf al-Muṣalliyīn*, ed. Muḥammad Maḥy al-Dīn 'Abd al-Ḥamīd (Bayrūt: Al-Maktabah al-'Aṣriyyah, 1999), 1 & 2.

⁸ Abū al-Ḥusayn Muḥammad bin Aḥmad bin 'Abd al-Raḥman Al-Maltī, *Al-Tanbīh wa al-Radd 'alā Ahl al-Ahwā' wa al-Bida'*, ed. Muḥammad Zāhid al-Kawtharī (Kaherah: Al-Maktabah al-Azhariyyah li al-Turāth, 2007).

⁹ 'Abd al-Qāhir bin Ṭāhir bin Muḥammad Al-Baghdādī, *Al-Farq bayn al-Firaq*, ed. Ibrāhīm Ramaḍān (Bayrūt: Dār al-Ma'rifah', 2001). Lihat naskhah terjemahan: Abu-Mansūr 'Abd-al-Kāhir ibn Ṭāhir Al-Baghdādī, *Moslem Schisms and Sects*. Terj. Seelye, Kate Chambers (New York: Ams Press Ins, 1966) ; Abu-Mansūr 'Abd-al-Kāhir ibn Ṭāhir Al-Baghdādī, *Moslem Schisms and Sects Part II*. Terj. Halkin, Abraham S. (Philadelphia: Porcupine Press Inc, 1978) ; dan Abd al-Qahir bin Tahir bin Muhammad Al-Baghdadi, *Aqidah Ahli Sunnah Wal Jamaah Satu Pengenalan*. Terj. Ibrahim Abu Bakar (Kuala Lumpur: Yayasan Dakwah Islamiah Malaysia (YADIM), 1982).

¹⁰ Abū al-Muzaffar Shāhḥūr bin Ṭāhir bin Muḥammad al-Shāfi'ī Al-Isfarāyīnī, *Al-Tabṣīr fī al-Dīn wa Tamyīz al-Firqah al-Nājiyyah 'an al-Firaq al-Hālikīn*, ed. Muḥammad Zāhid al-Kawtharī, (Kaherah: Al-Maktabah al-Azhariyyah li al-Turāth, 2010).

¹¹ Muḥammad bin Muḥammad al-Ghāzalī, 1964H/1383M. *Faḍā'ih al-Bāṭiniyyah*, ed. 'Abd al-Raḥman Badawī (Kaherah: al-Dār al-Qawmiyyah li al-Ṭabā'ah wa al-Nashr, 2015); Muḥammad bin Muḥammad al-Ghāzalī, *Al-Munqidh min al-Dalāl wa al-Muṣṣiḥ bi al-Ahwāl* (Bayrūt: Dār al-Minhāj, 2015)

¹² Muḥammad bin 'Abd al-Karīm al-Shahrastānī, *Al-Milal wa al-Niḥal*, ed. Aḥmad Fahmī Muḥammad (Bayrūt: Dār al-Kutub al-'Ilmiyyah, 1992)

¹³ Abdulfatah Haron Ibrahim (Kuala Lumpur: Jabatan Kemajuan Islam Malaysia, 1998); Abdulfatah Haron Ibrahim, Abdul Hayei Abdul Shukor, Mohd. Kamil Abd. Majid & Musa Fathullah Harun, *Tasawuf: Beberapa Persoalan* (Kuala Lumpur: Jabatan Kemajuan Islam Malaysia, 2004); Abdulfatah Haron Ibrahim, *Allah Antara Tasawuf dengan Akidah* (Kuala Lumpur: Dewan Bahasa dan Pustaka, 2008); Abdulfatah Haron Ibrahim, *Ajaran Sesat: Gerakan Sulit Wujudiah Batiniyah di Malaysia*, ed. 5 (Kuala Lumpur: Dewan Bahasa dan Pustaka, 2010).

Hamid@Yusoff Yunus,¹⁴ Farahwahida Mohd Yusof,¹⁵ Engku Ahmad Zaki Engku Alwi,¹⁶ Wan Mohd Azam Mohd Amin¹⁷ dan Mohamad Nidzam Abdul Kadir.¹⁸

Umumnya, kepincangan timbul apabila perbincangan berkaitan ajaran sesat dibicarakan pelbagai individu yang tidak diketahui kelayakannya. Bahkan wujud individu yang dianggap berkelayakan tetapi tidak menerima salah satu daripada perkara berkaitan Iman, Islam dan Ihsan atau disiplinnya Akidah, Fiqah dan Tasawuf. Persoalan mudahnya, bagaimana individu yang tidak menerima Tasawuf menilainya apa lagi isu-isu berkaitan tarekat? Bagaimana individu yang menolak ajaran ASWJ yang akidahnya Ashā'irah serta Maturidiyyah, fiqahnya mazhab Syafii, Hanafi, Hambali serta Maliki dan tasawufnya berasaskan ajaran al-Janayd serta al-Ghazālī menilai isu-isu berkaitan? Artikel ditulis bertujuan membincangkan isu-isu berkaitan dengan penghuraian definisi, sejarah serta isu ajaran sesat; pemikiran ASWJ; dan kajian ajaran sesat menurut ilmuwan ASWJ berasaskan kajian kualitatif dengan aplikasi metode analisis kandungan. Rumusannya ialah kerangka kajian ajaran sesat menurut ilmuwan ASWJ.

¹⁴ Abdul Hamid Ahmad, *Kenapa Masih Sesat* (Kuala Lumpur: Jabatan Kemajuan Islam Malaysia, 2001); Abdul Hamid@Yusoff Yunus, *Penjelasan Terhadap 58 Ciri Ajaran Sesat Di Malaysia* (Putrajaya: Jabatan Kemajuan Islam Malaysia, 2006) ; Abdul Hamid@Yusoff Yunus, *Asas Rujukan Dalam Bidang Akidah Islam* (Putrajaya: Jabatan Kemajuan Islam Malaysia, 2010)

¹⁵ Farahwahida Mohd Yusof, *Aliran Kepercayaan: Sejarah dan Perkembangannya Di Malaysia* (Johor Bahru: Universiti Teknologi Malaysia, 2007); Farahwahida Mohd Yusof, *Al-Arqaam & Ajaran Aurad Muhammadiyah: Satu Penilaian* (Johor Bahru: Universiti Teknologi Malaysia, 2007); Farahwahida Mohd Yusof, *Penyelewengan Ajaran Qadiani* (Johor Bahru: Universiti Teknologi Malaysia, 2008); Farahwahida Mohd Yusof, *Fatwa: Keberkesanannya Memerangi Ajaran Sesat Di Malaysia* (Johor Bahru: Universiti Teknologi Malaysia, 2011).

¹⁶ Engku Ahmad Zaki Engku Alwi, *Ajaran Sesat: Mengenali Jalan Yang Terpesong* (Selangor: PTS Publication & Distributors Sdn. Bhd, 2007).

¹⁷ Wan Mohd Azam Mohd Amin, *Ajaran Sesat* (Kuala Lumpur: Penerbit Universiti Islam Antarabangsa Malaysia (UIAM), 2009).

¹⁸ Mohamad Nidzam Abdul Kadir, *40 Ciri Ajaran Sesat* (Kuala Lumpur: Telaga Biru Sdn. Bhd, 2012).

DEFINISI, SEJARAH DAN ISU AJARAN SESAT

Islam merupakan agama benar dan diredai Allah SWT.¹⁹ Individu yang menganuti selain Islam tidak diterima dan dikategorikan sebagai yang rugi di akhirat kelak.²⁰ Agama Islam sempurna ajarannya dengan perakuan Allah SWT setelah pengutusan nabi serta rasul terakhir.²¹ Batasan agama Islam dengan lainnya ialah tidak menyembah selain Allah SWT, tidak sekutukan-Nya dengan sesuatu dan tidak mengambil selain Allah SWT sebagai Zat yang diagungkan.²² Dakwaan sebagai agama warisan Nabi Ibrahim AS tidak benar kepada selain Islam kerana Baginda AS seorang yang tetap di atas dasar Tauhid dan Muslim taat yang berserah bulat-bulat kepada Allah SWT.²³ Berdasarkan kepada aspek tauhid, Islam adalah yang paling hampir dengan ajaran Nabi Ibrahim AS.²⁴

Umat Islam menurut analisis al-Baghdādī²⁵ ialah mereka yang memperakui baharu alam, mengesakan Pencipta, iktikad qidam-Nya, sifat-sifat-Nya, keadilan-Nya dan kebijaksanaan-Nya, menafikan perumpamaan (*al-tashbīh*) ke atas-Nya, memperakui kenabian dan kerasulan Muhammad SAW kepada sekalian alam, kelangsungan (*ta'bīd*) syariat-Nya, segala yang dibawa-Nya adalah hak, al-Quran sebagai sumber perundangan syariah dan Kaabah merupakan arah kiblat yang wajib dihadapi ketika solat. Setiap yang memperakui semua perkara di atas tanpa dicemari bidaah yang membawa kepada kekufuran adalah seorang *sunni muwahid* (i.i. ahli sunah yang mengesakan Allah SWT).

Ajaran sesat umumnya ialah ajaran yang menyalahi ajaran Islam yang meliputi aspek kepercayaan, pengamalan dan kerohanian. Berdasarkan panduan wahyu, aspek yang dinamakan sebagai Iman, Islam dan Ihsan adalah perkara yang mengisi keperluan universal manusia yang tiga: [1] Iman, akidah atau aspek mental atau kepercayaan

¹⁹ *Āli 'Imrān* 3: 19.

²⁰ *Āli 'Imrān* 3: 85.

²¹ Lihat: *Al-Mā'idah* 5: 3; *al-Aḥzāb* 33: 40.

²² *Āli 'Imrān* 3: 64.

²³ *Āli 'Imrān* 3: 67.

²⁴ *Āli 'Imrān* 3: 68.

²⁵ Al-Baghdādī, *al-Farq bayn al-Firaq*, 18.

(*al-'aql*); [2] Islam, fiqah atau aspek fizikal atau pengamalan (*al-jasad*); dan [3] Ihsan, tasawuf atau aspek spiritual atau kerohanian (*al-qalb*). Ketiga-tiga komponen ini diperjelaskan dalam 'Hadis Jibril RA' dengan rumusan Baginda SAW iaitu: "*Jibril AS datang kepadamu untuk mengajarkan 'agama' kamu*".²⁶ Tuntasnya, 'Ajaran Islam' meliputi perkara Islam (*al-bad'*), Iman (*al-wast*) dan Ihsan (*al-kamāl*)²⁷ atau pemahamannya iaitu perkara kepercayaan, pengamalan dan kerohanian yang dipelajari melalui disiplin ilmu Akidah, Fiqah dan Tasawuf.

Perkataan sesat atau *ḍalāl* berakar katanya daripada *ḍalla*, *yaḍillu*, *ḍallan*, *dalālan*, *ḍalālatan*, *ḍāllun* iaitu memberi maksud hilang lenyap, sia-sia, sesat, kesesatan, menyeleweng daripada sesuatu dan tidak mendapat petunjuk.²⁸ Perkataan sinonimnya *baṭala*, *yabṭulu*, *buṭlān*,²⁹ *zaghā*, *yaẓūghu*, *ẓawghan*³⁰ atau *ghawā*, *yaghwī*, *ghayyan*.³¹ Sesat bermaksud jauh daripada jalan yang lurus sama ada sangat jauh atau sedikit, sengaja, terlupa atau tersalah. Sebab-sebab kesesatan dicatatkan dalam al-Quran kerana: kekufuran,³² kesyirikan,³³ kemaksiatan,³⁴ terbatal amalan³⁵ dan kesalahan disebabkan lupa, ghaflah atau tiada pengetahuan terhadap kebenaran.³⁶

Istilah 'jalan yang sesat' berlawanan 'jalan yang lurus' atau *al-sirāt al-mustaqīm* yang merupakan permohonan setiap Muslim kepada Allah SWT: "*Tunjukilah kami jalan yang lurus. Iaitu jalan orang-orang yang Engkau telah kurniakan nikmat kepada mereka, bukan (jalan)*

²⁶ Abī al-Ḥusayn Muslim bin al-Ḥajjāj bin Muslim, *Ṣaḥīḥ Muslim* (Al-Riyāḍ: Dār al-Salām li al-Nashr wa al-Tawzī', 2000) 24-25 (no. hadith 93).

²⁷ Muḥammad bin 'Abd al-Karīm al-Shahrastānī, *Al-Milal wa al-Niḥal*, ed. Aḥmad Fahmī Muḥammad (Bayrūt: Dār al-Kutub al-'Ilmiyyah, 1992), 35-36.

²⁸ *Al-Mu'jam al-Asāsī al-'Arabī* (t.tp.: Al-Munazzamah al-'Arabiyyah li al-Tarbiyyah wa al-Thaqāfah wa al-'Ulūm, 2003), 774-775. Lihat: *al-An'am* 6: 24; *al-Kahf* 18: 104; *al-Aḥzāb* 33: 36.

²⁹ *Al-Mu'jam al-'Arabī al-Asāsī*, 162; *al-A'rāf* 7: 118.

³⁰ *Al-Mu'jam al-'Arabī al-Asāsī*, 594; *al-Ṣaff* 61: 5.

³¹ *Al-Mu'jam al-'Arabī al-Asāsī*, hlm. 907; *al-Baqarah* 2: 256; *al-Shu'arā'* 26: 224; *al-Qaṣas* 28: 63.

³² *Al-Baqarah* 2: 108.

³³ *Al-Nisā'* 4: 116.

³⁴ *Al-Aḥzāb* 33: 36.

³⁵ *Al-Kahf* 18: 103-104.

³⁶ *Al-Shu'arā'* 42: 20.

orang-orang yang Engkau telah murkai dan bukan pula (jalan) orang-orang yang sesat".³⁷ Maksud: "*jalan orang-orang yang Engkau telah kurniakan nikmat*". menurut ahli tafsir seperti al-Ṭabarī,³⁸ Ibn Kathīr³⁹ dan al-Rāzī⁴⁰ ialah jalan para nabi, *siddiqīn*, para syuhada dan *sāliḥīn*. Maksud: "*bukan (jalan) orang-orang yang Engkau telah murkai*." (*al-maghdūb 'alayhim*) ialah Yahudi dan maksud: "*bukan pula (jalan) orang-orang yang sesat*." (*al-ḍālīn*) ialah *Naṣārā*, Nasrani atau Kristian.

Perkataan 'ajaran' bermaksud segala sesuatu yang diajarkan, nasihat, petunjuk, teori, mazhab atau hukuman.⁴¹ Manakala 'sesat' bermaksud tidak mengikut jalan yang betul, tersalah atau tersilap jalan, terkeliru atau menyimpang dari jalan yang benar.⁴² Lengkapnya, ajaran sesat menurut Jabatan Kemajuan Islam Malaysia (JAKIM)⁴³ bermaksud ajaran atau amalan yang dibawa oleh orang-orang Islam atau orang-orang bukan Islam yang didakwanya berdasarkan kepada ajaran Islam atau didakwa tidak berlawanan dengan dasar-dasar ajaran Islam tetapi sebenarnya ajaran atau amalan tersebut adalah berlawanan dengan akidah dan syaria Islam berdasarkan al-Quran dan Sunah.

Rumusannya, berdasarkan literatur dan situasi di Malaysia,⁴⁴ ajaran sesat dapat dirumuskan sebagai sebarang ajaran atau amalan yang didukung oleh orang-orang Islam dan bukan Islam yang mendakwa ianya berdasarkan ajaran Islam sedangkan pada hakikatnya bercanggah dengan agama Islam, bertentangan dengan al-Quran dan Sunah dan

³⁷ *Al-Fātiḥah* 1: 6-7.

³⁸ Abū Ja'far Muḥammad bin Jarīr bin Yazīd bin Kathīr al-Ṭabarī, *Jāmi' al-Bayān 'an Ta'wīl Ayy al-Qur'ān*, ed. Bashshār 'Awaḍ Ma'rūf & 'Iṣām Fāris al-Ḥaristānī (Bayrūt: Mu'assasah al-Risālah, 1994), 72-80.

³⁹ Al-Ḥāfiz 'Imād al-Dīn Abī al-Fidā' Ismā'il bin 'Umar al-Qurashī al-Dimashqī Ibn Kathīr, *Tafsīr al-Qur'ān al-'Azīm* (Bayrūt: Dār Ibn Ḥazm, 2000), 71-75.

⁴⁰ Fakhr al-Dīn Muḥammad bin 'Umar bin al-Husayn al-Rāzī, *Tafsīr al-Fakhr al-Rāzī al-Mushtahir bi al-Tafsīr al-Kabīr wa Mafātiḥ al-Ghayb* (Bayrūt: Dār al-Fikr li al-Tabā'ah wa al-Nashr wa al-Tawzī', 1981), 1: 261-266.

⁴¹ *Kamus Dewan*. Ed. ke-4. Kuala Lumpur: Dewan Bahasa dan Pustaka, 2007), 20.

⁴² *Ibid.*, 1478.

⁴³ Jabatan Kemajuan Islam Malaysia (JAKIM) *Penjelasan Ciri-ciri Utama Ajaran Sesat* (Kuala Lumpur: Jabatan Kemajuan Islam Malaysia, 2010), 3.

⁴⁴ Engku Ahmad Zaki, *Ajaran Sesat: Mengenal Jalan Yang Terpesong*, 26; Abdulfatah Haron Ibrahim, *Ajaran Sesat: Gerakan Sulit Wujudiah Batiniyah di Malaysia*, 1-2; JAKIM, *Penjelasan Ciri-ciri Utama Ajaran Sesat*, 3.

berlawanan dengan mazhab yang muktabar iaitu ASWJ dari sudut Akidah, Fiqah dan Tasawuf. Rumusan definisi ini bersesuaian dengan konteks kefahaman dan pengamalan ajaran Islam aliran ASWJ umat Islam di Nusantara sejak sekian lama yang meliputi aspek Akidah, Fiqah dan Tasawuf. Masyarakat Islam Alam Melayu sejak dahulu memiliki naratif akidah Asyari, fiqah Syafii dan tasawuf al-Ghazālī.⁴⁵

Sejarah Ajaran Sesat

Secara kronologinya para Nabi dan Rasul khususnya utusan pertama iaitu Nabi Adam AS adalah orang pertama memperjelaskan konsep Tauhid dan lawannya iaitu syirik. Semua para Nabi dan Rasul yang diutuskan Allah SWT membawa seruan sama: “*Hendaklah kamu menyembah Allah dan jauhilah Taghut*”.⁴⁶ Islam meraikan manusia yang bersifat kepelbagaian budaya (*multi-cultural*) dan kepelbagaian agama (*multi-religious*). Fitrah asal kejadian manusia cenderung mentauhidkan Allah SWT namun persekitaran merubahnya kepada syirik. Justeru, inti pati wacana al-Quran umumnya adalah dakwah mengembalikan manusia kepada mentauhidkan Allah SWT⁴⁷ dan penegasan hanya Islam satu-satunya agama yang diredai-Nya.⁴⁸

Isu ajaran sesat umumnya ialah penyelewengan terhadap ajaran Islam terutamanya isu ketuhanan atau ketauhidan dan isu berkaitan kenabian. Kelompok ajaran sesat terawal ialah para pengikut kepada individu yang mengaku sebagai sebagai nabi. Menurut Abu al-Sa‘ūd,⁴⁹ 11 orang individu mengaku nabi sejak zaman Rasulullah SAW dan Khulafā’ al-Rasyidin. Tiga daripadanya i zaman Rasulullah SAW iaitu al-Aswad Al-‘Unsī (w.11H), Musaylamah al-Kadhdhāb (w.11H) dan

⁴⁵ Abdullāh Fahim (m.1961) menjelaskan bangsa Melayu di setiap peringkat sama ada awam, ulama dan raja bermazhab al-Shāfi‘ī, berakidah al-Ash‘arī dan bertasawuf al-Ghazālī. Lihat: Muhammad Ayman al-‘Akiti, Ahmad Faiz Hafizuddin Rosli & Muhammad Amir Ashraf Rosdin, *Shaykh ‘Abdu’llah Fahim: ‘Ulamā’ Ahl al-Sunnah wa al-Jamā‘ah dan Perjuangan Kebangsaan* (Kajang: Akademi Jawi Malaysia Sdn. Bhd., 2020), 83-88.

⁴⁶ *Al-Nahl* 16: 36.

⁴⁷ *Al-An‘ām* 6: 126.

⁴⁸ *Āli ‘Imrān* 3: 19, 85.

⁴⁹ Nukilan: Engku Ahmad Zaki, *Ajaran Sesat: Mengenali Jalan Yang Terpesong*, 29-35.

Ṭulayḥah bin Khuwaylid (w.21H). Pada zaman Sayidina Abu Bakar al-Siddiq terdapat tujuh individu lagi mengakui nabi iaitu ‘Uyainah bin Hassan, Qurrah bin Salamah al-Qushayrī, al-Fujā’ah bin ‘Abd al-Yalīl (w.11H), Malik bin Nuwayrah (w.12H), Sajāḥ binti Al-Mundhir (w.55H), al-Ash‘ath bin Qays (w.40H) dan al-Ḥatam bin Zayd. Jabālah bin Al-Ayham (w.20H) adalah individu ke-11 mengaku nabi di zaman Sayidina ‘Umar al-Khattab (w.23H).

Fanatik terhadap satu-satu isu atau pemikiran punca khilaf dan perpecahan. Al-Baghdādī⁵⁰ menggariskan beberapa isu-isu perpecahan umat: [1] kewafatan Rasulullah SAW; [2] pemakaman Rasulullah SAW; [3] kepemimpinan atau imamat; [4] peninggalan (*fadak*) Rasulullah SAW; [5] ingkar kewajipan zakat; [6] peperangan terhadap Ṭulayḥah bin Khuwaylid, Musaylamah al-Kadhdhāb, Sajāḥ dan al-Aswad al-‘Unsī; [7] peperangan kelompok murtad; [8] peperangan terhadap Rom dan Ajam (i.i. bukan bangsa Arab); [9] isu berkaitan Sayidina Uthmān RA; [10] isu berkaitan Sayidina ‘Alī RA dan isu-isu al-Qadariyyah, al-Khawārij, al-Mu‘tazilah, al-Rawāfiḍ, al-Bakriyyah, al-Ḍarāriyyah, al-Jahmiyyah dan lain-lain yang akhirnya membentuk 73 kelompok umat.

72 kelompok menurut ASWJ masih dalam kategori umat Islam. Al-Baghdādī⁵¹ mengkategorikannya kepada dua iaitu masih dianggap umat Islam dan kedua bukan Islam. Pertama, kelompok dicemari bidaah seumpama al-Mu‘tazilah, al-Khawārij, al-Rāfiḍah al-Imāmiyyah, al-Zaydiyyah, al-Najjāriyyah, al-Jahmiyyah, al-Ḍarāriyyah dan al-Mujassimah. Mereka masih umat Islam pada sebahagian hukum hakam iaitu diharuskan pengebumian di perkuburan Islam, tidak dihalang menerima *al-fay’* serta ghanimah (i.i. harta rampasan perang) dan tidak ditegah solat di masjid. Pada hukum hakam yang lainnya tidak harus solat ke atasnya serta dibelakangnya, tidak halal sembelihannya, tidak dinikahkannya dengan wanita sunni dan tidak harus seorang sunni menikahi wanitanya. Kedua, kelompok yang dicemari bidaah seperti al-Bāṭiniyyah, al-Bayāniyyah, al-Mughāriyyah, al-Khaṭṭābiyyah dan

⁵⁰ Lihat: Al-Baghdādī, *al-Farq bayn al-Firaq*, hlm. 9-13; al-Shahrastānī, *Al-Milal wa al-Niḥal*, 11-29.

⁵¹ Al-Baghdādī, *al-Farq bayn al-Firaq*, 18-19.

lainnya⁵² yang terkeluar Islam. Antara sebab terkeluar Islam ialah iktikad ketuhanan imam-imam, menafikan kenabian serta kelangsungan syariat Rasulullah SAW, menganut panteisme, *al-hulūl* atau *al-ittihād* (i.i. asimilasi), inkarnasi (*al-tanāsukh*), menghalalkan yang haram atau sebaliknya dan mengharuskan nikah cucu perempuan daripada anak lelaki atau perempuan.

Isu-isu Ajaran Sesat

Isu-isu ajaran sesat paling utama ialah penyelewengan dalam ajaran Islam berkaitan persoalan ketuhanan, kenabian dan perkara ghaib. Komponen pertama *al-Ilahiyyāt* atau ketuhanan yang membincangkan kewujudan Khalik, keesaan-Nya, penjelasan zat, sifat serta perbuatan-Nya, tauhid-syirik dan Khalik-makhluk. Kedua, *al-Nubuwwāt* atau kenabian yang membincangkan Muhammad SAW sebagai rasul dan sifat-sifat wajib, mustahil serta harus bagi-Nya. Komponen ketiga *al-Sam'iyāt* atau perkara ghaib. Tiga perkara ini dirumus para ilmuwan ASWJ seperti Muḥammad bin Yūsuf al-Sanūsī (m.895H) daripada *al-Shahādatayn* (Dua Kalimah Syahadah) iaitu ikrar pertama menghendaki si peraku mengetahui perkara-perkara yang wajib, mustahil dan harus bagi Allah SWT. Ikrar kedua menghendaki si peraku mengetahui perkara-perkara wajib, mustahil dan harus bagi para rasul termasuk perkara-perkara keimanan yang dibawa Rasulullah SAW. Al-Sanūsī di dalam *Umm al-Barāhīn*⁵³ memperincikan pemahaman yang diperlukan daripada perakuan *al-Shahādatayn* ialah 50 perkara iaitu 20 perkara wajib, 20 mustahil dan 1 harus bagi Allah SWT. Tambahan 4 perkara

⁵² 21 kelompok yang terkeluar Islam menurut al-Baghdādī ialah: [1] Saba'iyyah; [2] Bayāniyyah; [3] Ḥarbiyyah; [4] Mughīriyyah; [5] Manṣūriyyah; [6] Janāhiyyah; [7] Khaṭṭābiyyah; [8] Ghurābiyyah; [9] Mufawwidah; [10] Hulūliyyah; [11] Aṣḥāb al-Tanāsukh; [12] Khābiṭiyyah; [13] Ḥimāriyyah; [14] Muqanna'iyyah; [15] Razāmiyyah; [16] Yazīdiyyah; [17] Maymūniyyah; [18] Bāṭiniyyah; [19] Ḥallājiyyah; [20] 'Adhāfariyyah; [21] Aṣḥāb Ibāḥah.

⁵³ Abū 'Abd Allāh Muḥammad bin Yūsuf al-Sanūsī, *Rasā'il al-Imām Abī 'Abd Allāh Muḥammad bin Yūsuf al-Sanūsī fī 'Ilm al-'Aqīdah 'alā Manhaj al-Asha'irah*, ed. 'Abd al-Karīm Qabūl (al-Maghrib: Dār al-Rashād al-Ḥadīthah, 2013), 98.

wajib, 4 mustahil dan 1 harus bagi rasul. Kesemuanya 50 perkara ini adalah tuntutan *al-Shahādatayn*. Lihat Rajah I⁵⁴.

Rajah I Tajuk, mauduk atau isu-isu Ilmu Kalam

أشهد أن لا إله إلا الله وأشهد أن محمد رسول الله

“Aku bersaksi bahawa tiada Tuhan melainkan Allah SWT dan Muhammad pesuruh Allah SWT”

(i) <i>al-Ilahiyyāt</i> atau perkara-perkara ketuhanan. 41 perkara daripada sifat-sifat wajib, mustahil dan harus bagi Allah SWT.	(ii) <i>al-Nubuwwāt</i> atau perkara-perkara kenabian. 9 perkara daripada sifat-sifat wajib, mustahil dan harus bagi rasul.	(iii) <i>al-Sam‘iyyāt</i> atau perkara-perkara ghaib. Perkara-perkara yang dibawa Rasulullah SAW khususnya perincian daripada 6 rukun Iman.
--	--	--

Isu utama lain yang menjadi asas khilaf sehingga mengakibatkan kelompok mazhab menurut al-Shahrastānī (m.549H)⁵⁵ ialah: [1] isu sifat-sifat dan tauhid; [2] isu qadar dan keadilan; [3] isu *wa‘d* (janji baik), *wa‘id* (janji buruk), nama-nama dan hukum hakam; dan [4] isu *sama‘* (wahyu, naqliah), akal, kerasulan dan keimaman.

Isu keempat berkaitan akal dan wahyu atau epistemologi iaitu teori tentang pengetahuan signifikannya membentuk pelbagai aliran mazhab. Menurut ASWJ, manusia memperolehi pengetahuan melalui tiga sumber: pancaindera (*al-absār*), akal (*al-af‘idah*) dan wahyu (*al-sam‘*).⁵⁶ Disebut dua iaitu akliah dan naqliah kerana pancaindera (i.i. alat perasa lima: deria rasa, bau, dengar, lihat dan sentuh)⁵⁷ alat kepada akal. Di sini ASWJ, akal dan wahyu menjadi teras kepada sumber

⁵⁴ Wan Haslan Khairuddin, “Abu al-Hassan al-Ash‘ari mujaddid Ilmu Kalam”, (Prosiding Seminar Gerakan Islah dalam Dunia Islam: Pemikiran dan Pengaruh Abu al-Hassan al-Ash‘ari dalam Masyarakat Melayu, 2017), 79-80.

⁵⁵ Al-Shahrastānī, *al-Milal wa al-Niḥal*, hlm. 5-6.

⁵⁶ Lihat: *Al-Naḥl* 16: 78; al-Taftāzānī, Sa‘d al-Dīn Ma‘ūd bin ‘Umar bin ‘Abd Allāh. 1987M/1407H. *Sharḥ al-‘Aqā‘id al-Nasaḥiyyah*. Aḥmad Ḥijāzī al-Siqā (pnyt.). Al-Qāhirah: Maktabah al-Kulliyāt al-Azhariyyah. Hlm. 15.

⁵⁷ *Kamus Dewan*, hlm. 1478.

perundangan Islam sehingga disepakati empat sumber utamanya iaitu al-Quran, Sunah, Ijmak dan *Qiyās*. Kedudukan akal sebagai panduan kehidupan manusia jelas apabila al-Quran sering mengulangi ayat-ayat berkaitan dengan lafaz-lafaz seperti *tafakkur*, *nazar*, *tabaṣṣur*, *tadabbur*, *tafaqquh*, *tadhakkur*, *i'tibar*, *ta'aqul* dan *tawassum*. Bahkan, golongan sesat ditempelak al-Quran sebagai golongan tidak berakal atau tidak mahu menggunakan akal.⁵⁸ Keperluan manusia terhadap akal dan wahyu tidak dapat dikecualikan⁵⁹ dan al-Ghazālī⁶⁰ mengumpamakan akal sebagai mata manakala wahyu sebagai cahaya. Lanjutnya, akal bersama dengan syarak (i.i. wahyu) adalah cahaya di atas cahaya.

Sumber pancaindera, akal dan wahyu menjadi teras dalam mensabitkan atau menafikan sesuatu sehingga ulama kalam menjadikannya pengantar Ilmu Tauhid iaitu hukum syarak (sumber wahyu), hukum adat (pancaindera) dan hukum akal (akal). Hukum syarak sama ada *taklīfī* iaitu wajib, sunat, harus, makruh dan haram atau *wada'ī* iaitu sebab, syarat dan halangan (*mānī*). Hukum adat penjelasan kaitan sebab-musabab atau faktor-kesan yang empat: ada-ada; tiada-tiada; ada-tiada; dan tiada-ada. Terma 'saintifik' hakikatnya adalah natijah penelitian pancaindera. Ada pun hukum akal batasan taakulannya tiga iaitu wajib, mustahil dan harus.⁶¹ Lihat Rajah II.⁶²

⁵⁸ *Yāsīn* 36: 62.

⁵⁹ Sa'īd 'Abd al-Laṭīf Fawdah, *Buḥuth fī 'Ilm al-Kalām* ('Ammān: Dār al-Rāzī li al-Ṭabā'ah wa al-Nashr wa al-Tawzī', 2004), 26.

⁶⁰ Abū Ḥāmid Muḥammad al-Ghazālī, *Al-Iqtisād fī al-I'tiqād* (Bayrut: Dār al-Kutub al-'Ilmiyyah, 1988), 3-4.

⁶¹ Al-Sanūsī, *Rasā'il al-Imām Abī 'Abd Allāh Muḥammad bin Yūsuf al-Sanūsī fī 'Ilm al-'Aqīdah 'alā Manhaj al-Asha'irah*, 29-38.

⁶² Wan Haslan Khairuddin, *Abu al-Hassan al-Ash'ari mujaddid Ilmu Kalam*, 81.

Rajah II Sumber dan sandaran hukum Ilmu Kalam

وَاللَّهُ أَخْرَجَكُمْ مِنْ بُطُونِ أُمَّهَاتِكُمْ لَا تَعْلَمُونَ شَيْئاً وَجَعَلَ لَكُمُ السَّمْعَ وَالْأَبْصَارَ وَالْأَفْئِدَةَ لَعَلَّكُمْ تَشْكُرُونَ [النحل: 78]

“Dan Allah mengeluarkan kamu dari perut ibu kamu dengan keadaan tidak mengetahui sesuatu pun dan Dia mengurniakan kepada kamu pendengaran, penglihatan dan hati supaya kamu bersyukur”

<p>(i) <i>al-sam'</i> atau wahyu menatijahkan hukum syarak. Hukum syarak: [a] <i>taklifi</i>: wajib, sunat, harus, makruh dan haram; [b] <i>waḍa'ī</i>: sebab, syarat dan halangan.</p>	<p>(ii) <i>al-absār</i> atau pancaindera menatijahkan hukum adat atau saintifik. Hukum adat perkaitan faktor-kesan: ada-ada, tiada-tiada, ada-tiada dan tiada-ada.</p>	<p>(iii) <i>al-af'idah</i> atau akal menatijahkan hukum akal. Hukum akal: wajib, mustahil dan harus.</p>
---	--	--

*Apabila disebutkan hanya dua iaitu wahyu dan akal maka pancaindera termasuk dalam akal kerana ianya merupakan deria perasa lima iaitu alat-alat bagi akal.

PEMIKIRAN AHLI SUNAH WALJAMAAH

Wacana berkaitan ASWJ dihuraikan para ulama kerana hadis-hadis perpecahan umat (*iftirāq al-ummah*) kepada 73 kelompok (*al-Firqah al-Islāmiyyah*). Hadis-hadis berkaitan mempunyai pelbagai konteks: [i] wujud riwayat tidak menyatakan kelompok yang binasa atau ke neraka; [ii] wujud riwayat yang menyatakan satu kelompok selamat dan selebihnya binasa; dan [iii] wujud riwayat yang menyatakan semuanya selamat kecuali satu binasa iaitu kelompok zindik (i.i. orang yang imannya telah terpesong, orang yang sesat tidak percaya agama Allah yang sebenarnya). Kesahan hadis-hadis berkaitan turut menjadi perbincangan selain mafhum *al-ummah* yang dikehendaki sama ada *umat al-da'wah* iaitu bukan Islam atau *umat al-ijābah* iaitu umat Islam. Antara ulama yang menerima hadis berkaitan dan berusaha menghitung 73 kelompok ialah Abū al-Ḥusayn al-Maltī (m.377H), Abū Mansūr al-

Baghdādī (m.429H), Abū al-Muzaffar al-Isfarāyīnī (m.471H) dan Muḥammad ‘Abd al-Karīm al-Shahrastānī (m.549H)⁶³.

Hadis-hadis *iftirāq al-ummah* diriwayatkan para sahabat termasuk khulafā’ al-Rāshidīn.⁶⁴ Al-Baghdādī dalam *al-Farq bayn al-Firaq*⁶⁵ merekodkan tiga buah lafaz hadis iaitu riwayat Abū Hurayrah RA,⁶⁶ ‘Abd Allah bin ‘Amr RA⁶⁷ dan Anas RA.⁶⁸ Konteks hadis pertama menyatakan 71 kelompok Yahudi, 72 Nasrani dan 73 umat Muhammad SAW tanpa sebarang penghukuman. Konteks hadis kedua menyatakan 72 kelompok Bani Israel dan 73 umat Muhammad SAW yang kesemuanya ke neraka kecuali kelompok yang menuruti jalan Rasulullah SAW dan para sahabatnya (*mā Anā ‘alayh wa aṣḥābī*). Konteks hadis ketiga menyatakan 71 kelompok Bani Israel dan 72 umat Muhammad SAW yang kesemuanya ke neraka kecuali *al-Jamaah* (i.i. kelompok dan majoriti umat).

Al-Baghdādī⁶⁹ menjelaskan bahawa apa yang dikehendaki oleh Rasulullah SAW sebagai kelompok mazmumah (i.i. tercela, tidak selamat) bukan kelompok fuqaha kerana mereka tidak mengkafirkan atau menyesatkan dalam persoalan furuk halal dan haram. Akan tetapi kelompok-kelompok sesat tersebut mereka yang menurut hawa nafsu

⁶³ Lihat: Muḥammad Zāhid al-Kawtharī, “Iftirāq al-Ummah ‘alā Firaq wa Kalimah ‘an al-Imām Abī al-Muzaffar al-Isfarāyīnī wa Kitāb al-Tabṣīr lahu,” dalam Abū al-Muzaffar Shāhūr bin Ṭāhir bin Muḥammad Al-Isfarāyīnī, *Al-Tabṣīr fī al-Dīn wa Tamyīz al-Firqaq al-Nājiyah ‘an al-Firaq al-Hālikīn* (Al-Qāhirah: Al-Maktabah al-Azhariyyah li al-Turāth, t.t), 3-11.

⁶⁴ Al-Baghdādī, *al-Farq bayn al-Firaq*, hlm. 13.

⁶⁵ Al-Baghdādī, *al-Farq bayn al-Firaq*, hlm. 9-13.

⁶⁶ Direkodkan riwayatnya dengan sedikit perbezaan lafaz: Abū Dā’ūd Sulaymān bin al-Ash ‘ath bin Ishāq al-Azdī al-Sajistānī, *Sunan Abī Dā’ūd* (Al-Riyād: Dār al-Salām li al-Nashr wa al-Tawzī’, 1999), 650 (no. hadith 4596).

⁶⁷ Direkodkan riwayatnya dengan sedikit perbezaan lafaz: Abū ‘Īsā Muḥammad bin ‘Īsā Al-Tarmidhī, *Sunan al-Tarmidhī*, ed. Ṣidqī Jamīl Al-Attār (Bayrūt: Dār al-Fikr, 2005), 759 (no. hadith 2650); Abū ‘Abd Allāh Muḥammad bin ‘Abd Allāh al-Naysābūrī Al-Hākīm, *Al-Mustadrak ‘alā al-Ṣaḥīḥayn*, ed. ‘Atā, Muṣṭafā ‘Abd al-Qādir (Bayrūt: Dār al-Kutub al-‘Ilmiyyah, 1987), 1: 218 (no. hadith 444).

⁶⁸ Direkodkan riwayatnya dengan lafaz yang sama: Ibn Mājah, Abū ‘Abd Allāh Muḥammad bin Yazīd al-Rab’ī al-Qazwīnī, *Sunan Ibn Mājah* (Al-Riyād: Dār al-Salām li al-Nashr wa al-Tawzī’, 1999), 574 (no. hadith 3993).

⁶⁹ Al-Baghdādī, *al-Farq bayn al-Firaq*, hlm. 9-15.

(*aṣḥāb al-ahwā' al-dālah*) dan menyalahi *al-firqah al-nājiyyah*. Al-Baghdādī menghitung 73 kelompok seperti berikut: 20 kelompok al-Rawāfiḍ, 20 al-Khawārij, 20 al-Qadariyyah al-Mu'tazilah, 5 al-Murji'ah, 3 al-Najjāriyyah, 1 al-Bakriyyah, 1 al-Darāriyyah, 1 al-Jahmiyyah, 1 al-Karāmiyyah dan kelompok ke-73 ialah Ahli Sunah Waljamah yang disifatkan sebagai *al-firqah al-nājiyyah*.

Dalam menjelaskan *al-firqah al-nājiyyah*, al-Baghdādī⁷⁰ mengomentari penunjuk (*indicator*) Rasulullah SAW iaitu 'kelompok yang menuruti aku dan para sahabatku'. Katanya, tiada kelompok yang muafakat dengan para sahabat kecuali ASWJ yang terdiri daripada fuqaha umat dan ahli kalam dengan prinsip *al-ṣifātiyyah*⁷¹. ASWJ menurutnya ialah lapan kelompok iaitu:⁷² [1] ulama kalam yang bebas dari fahaman *tashbīh* (menyerupakan sifat Allah dengan makhluk), bebas daripada fahaman *ta'tīl* (menafikan sifat-sifat Allah SWT) dan bebas daripada bidaah al-Rāfiḍah, al-Khawārij, al-Jahmiyyah, al-Najjāriyyah serta sekalian kelompok sesat; [2] para imam fiqah aliran *al-Ra'y* (rasional) serta *al-Hadīth* (tekstual) yang beriktikad perkara Usuluddin berdasarkan prinsip-prinsip *al-ṣifātiyyah*. Termasuk di dalamnya murid-murid Mālik, al-Shāfi'ī, al-Awzā'ī, al-Thawrī, Abū Ḥanīfah, Ibn Abū Laylā (m.148H), sahabat-sahabat Abū Thawr (m.240H), Aḥmad bin Ḥanbal (m.241H), ahli al-Zāhir dan seluruh fuqaha; [3] ulama ilmu-ilmu berkaitan periwayatan hadis dan sunah yang berupaya membezakan antara sahih dan cacat, mengetahui sebab-sebab *al-jarḥ* dan *al-ta'dīl* (kecacatan dan keadilan perawi); [4] ulama yang menguasai Sastera Arab, Nahu dan Saraf seperti al-Khalīl (m.175H), Abū 'Amr bin al-'Alā' (m.145H), Sībawayh (m.180H), al-Farrā' (m.207H), al-Akhfash (m.215H), al-Aṣma'ī, al-Māzinī (m.236H), Abū 'Ubayd (m.224H) dan seluruh imam-imam Nahu dari Kufah dan Basrah; [5] ulama yang menguasai ilmu qiraat al-Quran dan jenis-jenis tafsiran al-Quran, takwilannya berdasarkan mazhab-mazhab Ahli Sunah tanpa berpegang takwilan kelompok sesat; [6] para sufi zuhud yang menyediakan diri dengan sebaik-baik persiapan untuk hari akhirat.

⁷⁰ Al-Baghdādī, *al-Farq bayn al-Firaq*, hlm. 279.

⁷¹ Penamaan kepada kelompok Salaf menyalahi kelompok *al-Mua'tzilah* iaitu al-Mu'tazilah. Ciri *al-ṣifātiyyah* yang merupakan ASWJ kemudiannya berpindah kepada al-Ash'ariyyah. Lihat: al-Shahrastānī, *Al-Milal wa al-Nihal*, hlm. 79-81.

⁷² Al-Baghdādī, *al-Farq bayn al-Firaq*, hlm. 276-279.

Agamanya ialah tauhid, menafikan *tashbīh*, mazhab mereka *tafwīd*, tawakal kepada-Nya, penyerahan kepada kehendak-Nya, qanaah dengan apa yang direzekikan dan jauh dari sikap berbantah-bantah; [7] kelompok yang berada di perbatasan kaum Muslimin dalam berhadapan kaum kafir, berjihad melawan musuh-musuh Islam dan mengawal tanahair umat Islam; [8] kaum kebanyakan umat yang berada di negara-negara yang menzahirkan syiar-syiar Ahli Sunah Waljamaah.

Al-Baghdādī⁷³ merumuskan lapan kelompok ASWJ dengan menyatakan bahawa mereka ini kelompok Ahli Sunah Waljamaah dan kumpulan-kumpulannya adalah pengikut agama yang suci serta jalan yang lurus. ASWJ atau *al-firqah al-nājiyyah* tidak mengkafirkan kaum Muslim kecuali dengan asas-asas yang jelas. Seseorang dihukum kafir sekiranya mengkafirkan para sahabat atau mempunyai anutan yang melampaui batas-batas syarak. Kesemua 72 kelompok masih dikategorikan sebagai umat Islam atau ahli kiblat.⁷⁴ Selain itu, ASWJ memiliki syiar iaitu mereka mewajibkan doa terhadap umat Islam terdahulu supaya diampunkan dosa dan ditiadakan perasaan hasad dengki serta dendam terhadap orang beriman.⁷⁵

Ciri-ciri ASWJ ialah 15 usul teras didokumentasikan al-Baghdādī dalam *al-Farq bayn al-Firqah*⁷⁶ merangkumi aspek kehidupan iaitu Allah, manusia dan alam atau aspek ontologi, epistemologi, teologi dan *axiology* (i.i. falsafah kebaikan atau nilai): [1] mensabitkan hakikat serta ilmu secara khusus dan umum; [2] pengetahuan kebaharuan alam dalam setiap bahagiannya yang terdiri daripada sifat-sifat (*al-a'rad*; i.i sifat zat) dan jisim-jisim (zat kewujudan); [3] pengetahuan sifat-sifat-Nya yang azali; [4] Pencipta alam dan sifat-sifat zat-Nya; [5] pengetahuan nama-nama dan sifat-sifat-Nya; [6] pengetahuan keadilan-Nya dan hikmah-Nya; [7] pengetahuan para rasul dan nabi-Nya; [8] pengetahuan mukjizat para nabi dan keramat para wali; [9] pengetahuan apa yang disepakati umat daripada rukun-rukun syariat Islam; [10]

⁷³ Al-Baghdādī, *al-Farq bayn al-Firqah*, hlm. 279.

⁷⁴ Al-Baghdādī, *al-Farq bayn al-Firqah*, hlm. 276-279.

⁷⁵ *Al-Ḥaṣhr* 53: 10.

⁷⁶ Al-Baghdādī, *al-Farq bayn al-Firqah*, hlm. 283-318. Lihat huraian 15 usul berkaitan dalam: 'Abd al-Qāhir bin Ṭāhir bin Muḥammad Al-Baghdādī, *Usul al-Dīn*, ed. Ahmad Sham al-Dīn (Bayrūt: Dār al-Kutub al-'Ilmiyyah, 2002).

pengetahuan perintah, larangan dan taklif; [11] pengetahuan binasa para hamba dan hukum hakam berkaitan di akhirat; [12] khilafah, imamat dan syarat-syarat kepimpinan; [13] keseluruhan hukum-hakam Iman dan Islam; [14] pengetahuan hukum hakam para wali dan kedudukan para imam yang bertakwa; [15] pengetahuan hukum hakam berkaitan para musuh di kalangan kaum kafir dan kelompok sesat.

ASWJ atau *al-firqah al-nājiyyah* sinonim dengan kelompok al-Ashā'irah dan al-Māturidiyyah yang ajarannya bersih daripada kesesatan dan kekufuran.⁷⁷ Al-Sayyid Murtada al-Zabidi (m.1790/1205H) menegaskan:⁷⁸

إِذَا أُطْلِقَ أَهْلُ السُّنَّةِ فَالْمُرَادُ بِهِ الْأَشَاعِرَةُ وَالْمَأْتُرِيدِيَّةُ

Bermaksud: Apabila disebut Ahli Sunah Waljamaah maka yang dimaksudkan dengannya ialah fahaman atau fatwa yang diajar oleh ulama Asyairah dan Maturidiah.

Akidah al-Ash'arī, fikah al-Shāfi'ī dan tasawuf al-Junayd serta al-Ghazālī adalah pegangan umat di Alam Melayu⁷⁹. Muhammad Muktar bin Atarid (m.1930/1349H) pengarang *Inilah Kitab Usuluddin Iktikad Ahli Sunah Waljamaah*⁸⁰ menegaskan:

...dan bahawasanya Imām al-Shāfi'ī dan Imam Abī Ḥanīfah dan Imām Malik bin Anas dan Imam Ahmad bin Hanbal dan setangkalannya ulama ahli ijtihad... maka wajib atas tiap-tiap seorang yang bukan ahli ijtihad bahawa ia taklid yakni mengikut pada hukum fiqah akan salah satu daripada mazhab mereka itu...dan bahawasanya Imam Abi Hassan Asyari dan Imam Abu Mansur Maturidi itu ikutan yang benar pada bab iktikad..dan bahawasanya tarekat Abi al-

⁷⁷ Lihat: 'Abd Allāh bin 'Alawī al-Ḥaddād, *Dīwān al-Imām al-Ḥaddād* atau *al-Durr al-Manzūm lidhawī al-'Uqūl wa al-Fuhūm* (t.tp.: t.p, t.t), 231.

⁷⁸ Al-Sayyid Murtada al-Zabīdī, *Ittiḥāf al-Sādah al-Muttaqīn* (Bayrūt -Lubnān: Mu'assasah al-Tārikh al-'Arabī, 1994), 2: 5.

⁷⁹ Lihat: Muhammad Ayman al-'Akiti et. al, *Shaykh 'Abdu'llah Fahim: 'Ulamā' Ahl al-Sunnah wa al-Jamā'ah dan Perjuangan Kebangsaan*, (t.tp: t.p, t.t), 83-88.

⁸⁰ Muhammad Muktar bin Atarid, *Inilah Kitāb Uṣūl al-Dīn I'tiqād Ahl al-Sunnah wa al-Jamā'ah* (t.tp.: Percetakan Nahdī, t.t), 5-6.

Qasim Junayd al-Baghdadi dan sekalian ikutan itu tarekat yang benar yang suci bidaah.

KAJIAN AJARAN SESAT MENURUT ILMUWAN AHLI SUNAH WALJAMAAH

Ilmu Kajian Ajaran Sesat bukan disiplin ilmu baharu sebaliknya merupakan pecahan wacana Ilmu Tauhid atau Ilmu Kalam. Ilmu Kalam berdasarkan beberapa definisi bermaksud ilmu berkaitan pengukuhan perkara-perkara akidah dengan hujah-hujah yang diyakini dan penolakan terhadap segala keraguan.⁸¹ Menurut Sa'īd Ramaḍān al-Būṭī,⁸² Ilmu Kalam adalah diskusi-diskusi ilmiah berkaitan isu-isu di dalam akidah Islam. Sesuai penamaan, Ilmu Kalam menggambarkan sifatnya yang menuntut keupayaan daya taakul dalam memberikan hujah-hujah yang meyakinkan serta dalil-dalil yang mampu menangkis sebarang keraguan. Ilmu Kalam adalah mekanisme dalam pemeliharaan kesucian agama Islam daripada sebarang penyelewengan, kesesatan dan kekufuran. Ilmu Kalam adalah disiplin yang mendiskusikan kepercayaan penganut agama (*intrareligion* atau intra-Islam) dan kepercayaan agama-agama (*interreligions*) termasuk falsafah serta ideologi.⁸³ Keduanya adalah wacana induk Ilmu Kalam⁸⁴. Tradisi wacana Ilmu Kalam terhadap dua

⁸¹ al-Sayyid al-Sharīf 'Alī bin Muḥammad Al-Jurjānī, 1998. *Sharḥ al-Mawaqif wa ma'ahu Ḥāshiyatā al-Sayālakūtī wa al-Ḥalabī* ed. Maḥmūd 'Umar al-Dimyāṭī (Bayrūt: Dār al-Kutub al-'Ilmiyyah, 1998) 1-8: 40; Sa'd al-Dīn Ma'ūd bin 'Umar bin 'Abd Allāh Al-Taftāzānī, *Sharḥ al-Maqāsid*, ed. 'Abd al-Raḥman 'Umayrah (Bayrūt: 'Ālam al-Kutub, 1998), 1:163; Waliyy al-Dīn 'Abd al-Raḥman bin Muḥammad Ibn Khaldūn, *Muqaddimah Ibn Khaldūn*, ed. 'Abd Allah Muḥammad al-Darwīsh (Dimashq: Dār Ya'rab, 2004), 205.

⁸² Muḥammad Sa'īd Ramaḍān Al-Būṭī, *Kubrā al-Yaqīniyyāt al-Kawniyyah: Wujūd al-Khāliq wa Wazīfah al-Makhlūq* (Dimashq: Dār al-Fikr, 1979), 17.

⁸³ Al-Jurjānī, *Sharḥ al-Mawaqif*, 164-165; Muḥammad Aḥmad Muḥammad 'Āmūh., t.th. *Al-Jawāb al-Tām 'an Ḥukm Ta'allum 'Ilm al-Kalām* (Al-Ḥudaydah: Al-Hay'ah al-'Ilmiyyah bi Ribāt Abī Bakr al-Ṣiddīq li al-'Ulūm al-Shar'iyyah, t.t), 4-5; Hasan Mahmud al-Shafe'i, "Hakikat Ilmu Kalam: definisi, matlamat, metode, topik perbincangan dan kedudukannya dalam ilmu-ilmu Islam." terj. Wan Suhaimi Wan Abdullah. *Afkar* 04(Mei) (2004): 1-24.

⁸⁴ Wan Haslan Khairuddin, "Tema dan metode kritikan Raḥmatullāh al-Kayrānawī terhadap Bible berdasarkan kitab Izhār al-Ḥaq" (Tesis Ph.D. Universiti Kebangsaan Malaysia, 2018), 90-107; Wan Haslan Khairuddin, Indriaty Ismail & Abdull Rahman

kategori ini boleh dilihat menerusi khazanah tinggalan imam ASWJ iaitu Abū al-Ḥassan al-Ash‘arī (m.324H/935M). Pertama, karyanya *Maqālāt al-Islāmiyyīn wa Ikhilāf al-Muṣalliyīn*⁸⁵ khusus mewacanakan kepercayaan antara penganut agama. Kedua, kitab *Maqālāt ghayr al-Islāmiyyīn*⁸⁶ mewacanakan kepercayaan antara agama-agama. Ketiga, *Jumal al-Maqālāt*⁸⁷ adalah wacana terhadap kedua-dua kategori kepercayaan.

*Al-Milal wa al-Niḥāl*⁸⁸ karya al-Shahrastānī (m.549H) merupakan contoh karya lain tokoh besar ilmuwan ASWJ yang mewacanakan kedua-dua kategori kepercayaan. Al-Shahrastānī membahagikan *Arbāb al-Diyānāt wa al-Milal* (kelompok agama-agama) sebagai wacana kepercayaan antara penganut agama (*intrareligion* atau *intra-Islam*) dan *Ahl al-Ahwā’ wa al-Niḥal* (kelompok ideologi-ideologi) sebagai wacana antara agama-agama (*interreligions*) serta kepercayaan-kepercayaan lain. Resam ilmuwan ASWJ di atas menjelaskan hubungan pemahaman antara pelbagai pemikiran tidak boleh dipisahkan kerana skop perbezaan atau persamaannya masih dalam lingkungan sama ada aspek ontologi, epistemologi, *axiology* (i.i. falsafah kebaikan atau nilai), teologi, metodologi. Individu yang berkecimpung dalam dialog, diskusi dan debat antara kepercayaan atau agama mesti mempunyai pendedahan dengan Ilmu Kalam bersama ilmu-ilmu di dalam disiplin Pengajian Usuluddin. Pengabaian disiplin berkaitan boleh mengakibatkan kecelaruan serta kepincangan. Buktinya, wujud dakwaan individu yang

Mahmood, “Ilmu kajian agama-agama dalam tradisi Islam,” *Akademika* 90.2 (2020), 140-146.

⁸⁵ Abū al-Ḥassan ‘Alī bin Ismā‘īl al-Ash‘arī, *Maqālāt al-Islāmiyyīn wa Ikhilāf al-Muṣalliyīn*, ed. Muḥammad Maḥy al-Dīn ‘Abd al-Ḥamīd, (Bayrūt: Al-Maktabah al-‘Aṣriyyah, 1999), 1 & 2.

⁸⁶ Karya ini dinyatakan kewujudannya: Ibn Taymiyyah, Aḥmad bin ‘Abd al-Ḥalīm bin ‘Abd al-Salām, *Dar’ al-Ta‘arūf al-‘Aql wa al-Naql aw Muqāfaḥah Ṣaḥīḥ al-Manqūl li Ṣarīḥ al-Ma‘qūl* ed. Al-Sayyid Muḥammad al-Sayyid & Sayyid Ibrāhīm Ṣādiq (Al-Qāhirah: Dar al-Ḥadīth, 2006), 1: 191.

⁸⁷ Karya ini dinyatakan kewujudannya: Ibn ‘Asākir, Abū al-Qāsim ‘Alī bin al-Ḥassan bin Hibbah Allāh al-Dimashqī. *Tabyīn Kazb al-Muftarī fīmā Nusiba ilā al-Imām Abī al-Ḥassan al-Ash‘arī*, ed. Muḥammad Zāhid al-Kawtharī (Al-Qāhirah: Al-Maktabah al-Azhariyyah li al-Turāth, 2014), 107.

⁸⁸ Muḥammad bin ‘Abd al-Karīm al-Shahrastānī, *Al-Milal wa al-Niḥal*. Aḥmad Fahmī Muḥammad (Bayrūt: Dār al-Kutub al-‘Ilmiyyah, 1992).

dianggap tokoh ‘Perbandingan Agama’ bahawa nama ‘Vishnu’ dan ‘Brahma’ boleh dirujuk Allah *Jallā wa ‘Alā* (Maha Agung dan Maha Tinggi) hanya kerana persamaan maksud dengan ‘al-Rabb’ dan ‘al-Khāliq’ (Zakir Naik t.th. & 2013).

Signifikan kaitan antara teologi, agama, kepercayaan dan ideologi apabila Rasulullah SAW mengumpamakan setiap kelompok sesat dari kalangan umat Islam dengan kelompok sesat agama terdahulu seperti Majusi, Yahudi dan Kristian.⁸⁹ Al-Qadariyyah diumpamakan dengan Majusi kerana berkongsi asas dualisme, al-Mushabbihah seperti Yahudi kerana menyifatkan Tuhan dengan sifat-sifat manusia dan al-Rāfiḍah persis fahaman Nasrani kerana menyifatkan manusia dengan sifat-sifat Tuhan.

Ilmu Kalam adalah piawaiian terhadap isu-isu yang diwacanakan dalam kedua-dua kategorinya. Ianya semulia ilmu kerana mengandungi hujah-hujah keimanan dengan dalil-dalil akliah serta naqliah. Peranannya besar dalam mempertahankan agama berhadapan dengan musuh-musuh Islam terdahulu bahkan perantaraan mithali (i.i. kaedah yang tidak pernah digunapakai) dalam memberi jawapan balas terhadap musuh-musuh Islam.⁹⁰ Mulia Ilmu Kalam kerana terkait dengan zat Allah *Jalla wa ‘Alā*, zat para rasul-Nya dan perkara-perkara yang mengiringi kedua-Nya (i.i. *al-Sam‘iyyāt*, *al-Ghaybiyyāt*).⁹¹ Penamaan *al-Fiqh al-Akbar* menjelaskan keutamaan Ilmu Kalam berbanding ilmu lain. Pengetahuan berkaitan cabang dan pengamalan (*far‘iyyah wa ‘amaliyyah*) dikenali dengan *al-Fiqh* atau Ilmu Fiqah. Manakala pengetahuan berkaitan tunjang dan kepercayaan (*aṣṣiyyah wa i‘tiqadiyyah*) dinamakan dengan *al-Fiqh al-Akbar*.⁹² Ilmu Kalam wajib dipelajari kerana ianya berkeupayaan mensabitkan akidah dan menolak

⁸⁹ Lihat: al-Shahrestānī, *Al-Milal wa al-Niḥal*, hlm. 10.

⁹⁰ Aḥmad Al-Mahdī, *Sharḥ al-Mawāqif fī ‘Ilm al-Kalām: Al-Mawqif al-Khāmīs fī al-Ilāhiyyāt* (Ḥadā’iq al-Qubbah: t.tp., 1976), 3-4.

⁹¹ Burhān al-Dīn Ibrāhīm bin Muḥammad al-Bayjūrī, 2014M/1435H. *Hāshiyah al-Imām al-Bayjūrī ‘alā Jawharah al-Tawḥīd al-Musammā Tuḥfah al-Murīd ‘alā Jawharah al-Tawḥīd*, ed. ‘Ali Jumu‘ah (Al-Qāhirah: Dār al-Salām, 2014), 39.

⁹² Al-Taftāzānī, *Sharḥ al-‘Aqā’id al-Nasafiyyah*, 9-10; al-Taftāzānī, *Sharḥ al-Maqāṣid*, 1: 164.

sebarang keraguan.⁹³ Fardu ain ke atas setiap mukalaf lelaki atau perempuan mempelajarinya secara *ijmāl* (ringkas) dan mempelajarinya secara *tafsil* (huraian atau satu persatu) adalah fardu kifayah (i.i. tuntutan bersama bagi orang Islam yang apabila dilaksanakan oleh seseorang antara mereka maka yang lain bebas daripada tanggungjawab tersebut).

Kedudukan pentingnya Ilmu Kalam terutama dalam bidang kajian agama, pemikiran dan ideologi jelas signifikannya melalui saranan Abū al-Ḥassan al-Ash‘arī (m.324H) melalui karyanya *Risālah Istihsān al-Khawḍ fī ‘Ilm al-Kalām*⁹⁴ selain karya lainnya.⁹⁵ Melalui literatur karya-karya tokoh ilmuwan ASWJ dalam tema *al-Firaq al-Islāmiyyah* seperti karya al-Maltī (m.377H),⁹⁶ al-Baghdādī (m.429H),⁹⁷ al-Isfārāyīnī (m.471H)⁹⁸ dan al-Shahrastānī (m.549H)⁹⁹ dan al-Rāzī (m.606H)¹⁰⁰ atau karya-karya dalam tema umum Ilmu Kalam seperti

⁹³ ‘Āmūh, *al-Jawāb al-Tām ‘an Ḥukm Ta‘allum ‘Ilm al-Kalām*, hlm. 8; al-Bayjūrī, *Tuḥfah al-Murīd ‘alā Jawharah al-Tawḥīd*, hlm. 40.

⁹⁴ Abū al-Ḥassan Al-Ash‘arī, *Risālah Istihsān al-Khawḍ fī ‘Ilm al-Kalām*, ed. Muḥammad al-Waliyy al-Ash‘arī al-Qādirī al-Rifā‘ī (Bayrūt: Dār al-Mashārī‘ li al-Ṭaba‘ah wa al-Nashr wa al-Tawzī‘, 1995); Mohd Radhi Ibrahim & Rawiyah Mohd Junoh, *Risālah fī al-istihsān al-khawḍ fī ilm al-Kalām* karangan Imām al-‘Ash‘arī: terjemahan teks. *Afkar* 04(Mei) (2003), 1-28.

⁹⁵ Karya-karya: *Maqālāt al-Islāmiyyīn wa Ikhlāf al-Muṣalliyīn, Maqālāt ghayr al-Islāmiyyīn* dan *Jumal al-Maqālāt*.

⁹⁶ Lihat: Abū al-Ḥusayn Muḥammad bin Aḥmad bin ‘Abd al-Raḥman al-Maltī, *Al-Tanbīh wa al-Radd ‘alā Ahl al-Ahwā’ wa al-Bida’*, ed. Muḥammad Zāhid al-Kawtharī (Al-Qāhirah: Al-Maktabah al-Azhariyyah li al-Turāth, 2007).

⁹⁷ Lihat: ‘Abd al-Qāhir bin Ṭāhir bin Muḥammad al-Baghdādī, *Al-Farq bayn al-Firaq*, ed. Ibrāhīm Ramaḍān (Bayrūt: Dār al-Ma‘rifah; al-Baghdādī, 2001); ‘Abd al-Qāhir bin Ṭāhir bin Muḥammad. *Usul al-Dīn*, ed. Ahmad Sham al-Dīn (Bayrūt: Dār al-Kutub al-‘Ilmiyyah, 2002).

⁹⁸ Lihat: Abū al-Muzaffar Shāhfūr bin Ṭāhir bin Muḥammad al-Shāfi‘ī al-Isfārāyīnī, *Al-Tabṣīr fī al-Dīn wa Tamyīz al-Firqaq al-Nājiyyah ‘an al-Firaq al-Hālikīn*, ed. Muḥammad Zāhid al-Kawtharī (Al-Qāhirah: Al-Maktabah al-Azhariyyah li al-Turāth, 2010).

⁹⁹ Lihat: Muḥammad bin ‘Abd al-Karīm al-Shahrastānī, *Al-Milal wa al-Niḥal*, ed. Aḥmad Fahmī Muḥammad (Bayrūt: Dār al-Kutub al-‘Ilmiyyah, 1992).

¹⁰⁰ Lihat: Fakhr al-Dīn Muḥammad bin ‘Umar bin al-Ḥusayn al-Rāzī, *Al-Riyāḍ al-Mūniqah fī Arā’ Ahl al-‘Ilm*, ed. As‘ad Jum‘ah (Al-Qayrawān: Kulliyah al-Ādāb wa al-‘Ulūm al-Insāniyyah & Markaz al-Nashr al-Jāmi‘ī, 2004)

karya al-Bayḍawī (m.685H),¹⁰¹ al-Aṣḥānī (m.749H),¹⁰² al-Ījī (m.756H),¹⁰³ al-Taftāzānī (m.793H),¹⁰⁴ al-Jurjānī (m.816H)¹⁰⁵ dan al-Dawwānī (m.918H)¹⁰⁶ serta himpunan karya-karya lainnya yang boleh dirujuk ‘Ali Jumu‘ah,¹⁰⁷ Khālid Zahrī¹⁰⁸ dan ‘Abd Allāh bin ‘Abd al-‘Azīz al-‘Izzī¹⁰⁹ maka kerangka kajian ajaran sesat menurut ASWJ dapat dirumuskan. Kerangka kajian teologi, agama, pemikiran dan ideologi khususnya kajian ajaran sesat menurut ASWJ berdasarkan literatur serta perbincangan topik dan sub topik artikel ini yaitu Islam sebagai agama tauhid, kedudukan serta peranan Ilmu Kalam, pemikiran ASWJ dan isu-isu ajaran sesat menatijahkan rumusan seperti Rajah III.

¹⁰¹ Lihat: ‘Abd Allāh bin ‘Umar Al-Bayḍawī, *Ṭawālī ‘al-Anwār min Maṭāli ‘al-Anzār*, ed. ‘Abbās Sulaymān (Al-Qāhirah: Al-Maktabah al-Azhariyyah li al-Turāth, 1991).

¹⁰² Lihat: Sham al-Dīn bin Maḥmūd al-Aṣḥānī, *‘al-Anzār ‘ala Matn Ṭawālī ‘al-Anwār wa Hāshiyah al-Sayyid al-Sharīf ‘Ali bin Muḥammad al-Jurjānī* (Al-Qāhirah: Dār al-Kutubī, 2008).

¹⁰³ Lihat: ‘Idd al-Dīn ‘Abd al-Raḥman bin Aḥmad Al-Ījī, *Al-Mawāqif fī ‘Ilm al-Kalām* (Bayrūt: ‘Ālam al-Kutub, t.t).

¹⁰⁴ Lihat: Sa‘d al-Dīn Ma‘ūd bin ‘Umar bin ‘Abd Allāh al-Taftāzānī, *Sharḥ al-Maqāṣid*. ‘Abd al-Raḥman ‘Umayrah (Bayrūt: ‘Ālam al-Kutub, 1998), 1-5.

¹⁰⁵ Lihat: Al-Sayyid al-Sharīf ‘Alī bin Muḥammad al-Jurjānī, 1998. *Sharḥ al-Mawāqif wa ma‘ahu Hāshiyatā al-Sayyid al-Sharīf ‘Alī bin Muḥammad al-Jurjānī*, ed. Maḥmūd ‘Umar al-Dimyāṭī (Bayrūt: Dār al-Kutub al-‘Ilmiyyah, 1998), 1-8.


¹⁰⁶ Lihat: Jalāl al-Dīn al-Dawwānī, *Ta‘rīf ‘Ilm al-Kalām*, ed. Nizār Ḥammādī (Tūnis: Dār al-Imām Ibn ‘Arafah, 2017).

¹⁰⁷ Lihat: ‘Ali Jumu‘ah, *Al-Kutub al-Mukawwinah li al-Fikr al-Islamī (Al-Sunnī)*. (‘Ammān: Al-Markaz al-Malakī li al-Buḥūth wa al-Dirāsāt al-Islāmiyyah (MABDA), 2014); ‘Ali Jumu‘ah, *Al-Kutub al-Mukawwinah li al-Fikr al-Islamī al-Sunnī* (Al-Qāhirah: Dār al-Ṣāliḥ, 2017).

¹⁰⁸ Lihat: Khālid Zahrī. *Al-Maṣādir al-Maghribiyyah li al-‘Aqīdah al-Ash‘ariyyah* (Al-Maghrib: Markaz Abī al-Ḥassan al-‘Asharī li al-Dirāsāt wa al-Buḥūth al-‘Aqdiyyah, 2017).

¹⁰⁹ Lihat: ‘Abd Allāh bin ‘Abd al-‘Azīz bin ‘Abd Allāh al-‘Izzī, *Al-Maṣādir al-Aṣḥānīyyah al-Maṭbu‘ah li al-‘Aqīdah al-Ash‘ariyyah* (Bayrūt: Markaz Namā’ li al-Buḥūth wa al-Dirāsāt, 2018).

Kerangka Kajian Ajaran Sesat Menurut Ahli Sunah Waljamaah



Rajah III Kerangka kajian teologi, agama, pemikiran dan ideologi menurut Ahli Sunah Waljamaah

KESIMPULAN

Tugas mengajak manusia kepada tauhid iaitu mengesakan Allah SWT adalah misi seluruh para Nabi serta Rasul yang diwarisi oleh para ulama zaman berzaman. Jenis-jenis penyelewengan, kesesatan dan kekufuran berterusan berlaku ibarat barah yang mengakibatkan kerosakan pada aspek kepercayaan, pengamalan dan kerohanian seseorang Muslim. Para ulama khususnya ahli kalam memainkan peranan dengan perbahasan, perdebatan dan penulisan berkaitan isu-isu kesesatan yang menyalahi ajaran Ahli Sunah Waljamaah. Dewasa ini perbincangan serta perbahasan berkaitan ajaran sesat dibicarakan umum tanpa dapat dikenal pasti atau diketahui kelayakan individunya.

Kajian ajaran sesat yang berorientasikan ASWJ memerlukan kepada kerangka yang jelas sebagai panduan dalam perbincangan serta perbahasan terhadap isu-isu berkaitan. Orientasi pemikiran al-Ashā'irah dan al-Māturidiyyah yang mewakili ASWJ adalah pemikiran *wasaṭiyyah* yang tidak mudah mengkafirkan kaum Muslimin kecuali apabila melampaui batasnya. Dalam mempertahankan kesucian agama Islam, para ulama ASWJ menjadikan Ilmu Kalam sebagai mekanisme sesuai dengan matlamatnya iaitu pengukuhan perkara-perkara akidah dengan hujah-hujah yang diyakini dan penolakan terhadap sebarang keraguan. Ilmu Kalam dengan dua subwacananya iaitu diskusi antara penganut agama (*intrareligion* atau intra-Islam) dan diskusi antara agama-agama (*interreligions*) tidak boleh dipinggirkan apa lagi diabaikan kerana boleh menatijahkan kekeliruan dan kecelaruan.

Kajian ajaran sesat adalah bidang genting, runcing dan penting yang memerlukan individu berkeahlian dalam bidang-bidangnya sama ada Akidah, Fiqah dan Tasawuf. Tidak sewajarnya individu yang menolak pegangan dominan majoriti ASWJ iaitu al-Ashā'irah serta al-Maturidiyyah, tidak beramal dengan fiqah yang empat dan menolak pengamalan tasawuf serta tarekat menilai isu-isu berkaitan. Lapan kelompok ASWJ sebagaimana catatan al-Baghdādī dalam *al-Farq bayn al-Firaq* adalah panduan yang menjelaskan bahawa setiap bahagian tersebut mempunyai tokoh serta ahlinya. Rumusannya, Ilmu Kalam berorientasikan ASWJ (al-Ashā'irah serta al-Maturidiyyah) dengan panduan akal serta wahyu atau empat sumber perundangan Islam yang disepakati iaitu al-Quran, Sunah, Ijmak dan Qiyās berperanan menjaga kesucian akidah Islam daripada sebarang kecelaruan, kesesatan atau kekufuran. Pengaplikasian ajaran tauhid menurut ASWJ meliputi aspek kepercayaan, pengamalan dan kerohanian yang mana disiplin ilmu yang berkaitan dengannya adalah Akidah, Fiqah dan Tasawuf.

RUJUKAN

- ‘Āmūh, Muḥammad Aḥmad Muḥammad, *Al-Jawāb al-Tām ‘an Ḥukm Ta‘allum ‘Ilm al-Kalām*. Al-Ḥudaydah: Al-Hay’ah al-‘Ilmiyyah bi Ribāṭ Abī Bakr al-Ṣiddīq li al-‘Ulūm al-Shar‘iyyah, t.t.
- Abdul Hamid Ahmad, *Kenapa Masih Sesat*. Kuala Lumpur: Jabatan Kemajuan Islam Malaysia, 2001.

- Abdul Hamid@Yusoff Yunus, *Asas Rujukan Dalam Bidang Akidah Islam*. Putrajaya: Jabatan Kemajuan Islam Malaysia, 2010.
- Abdul Hamid@Yusoff Yunus, *Penjelasan Terhadap 58 Ciri Ajaran Sesat Di Malaysia*. Putrajaya: Jabatan Kemajuan Islam Malaysia, 2006.
- Abdulfatah Haron Ibrahim, Abdul Hayei Abdul Shukor, Mohd. Kamil Abd. Majid & Musa Fathullah Harun, *Tasawuf: Beberapa Persoalan*. Kuala Lumpur: Jabatan Kemajuan Islam Malaysia, 2004.
- Abdulfatah Haron Ibrahim, *Ajaran Sesat: Gerakan Sulit Wujudiah Batiniyah di Malaysia*, ed. 5. Kuala Lumpur: Dewan Bahasa dan Pustaka, 2010.
- Abdulfatah Haron Ibrahim, *Allah Antara Tasauf dengan Akidah*. Kuala Lumpur: Dewan Bahasa dan Pustaka, 2008.
- Abdulfatah Haron Ibrahim, *Martabat Tujuh*. Kuala Lumpur: Jabatan Kemajuan Islam Malaysia, 1998.
- Abū Dā'ūd, Sulaymān bin al-Ash 'ath bin Ishāq al-Azdī al-Sajistānī, *Sunan Abī Dā'ūd*. Al-Riyāḍ: Dār al-Salām li al-Nashr wa al-Tawzī', 1999.
- Al-'Izzi, 'Abd Allāh bin 'Abd al-'Azīz bin 'Abd Allāh, *Al-Maṣādir al-Aṣliyyah al-Maṭbu'ah li al-'Aqīdah al-Ash'ariyyah*. Bayrūt: Markaz Namā' li al-Buḥūth wa al-Dirāsāt. 2018.
- Al-Aṣfahānī, Sham al-Dīn bin Maḥmūd. *Maṭāli' al-Anzār 'ala Matn Ṭawāli' al-Anwār wa Hāshiyah al-Sayyid al-Sharīf 'Ali bin Muḥammad al-Jurjānī*, Al-Qāhirah: Dār al-Kutubī, 2008.
- Al-Ash'arī, Abū al-Ḥassan 'Alī bin Ismā'il, *Maqālāt al-Islāmiyyīn wa Ikhlāf al-Muṣalliyīn*, Ed. Muḥammad Maḥy al-Dīn 'Abd al-Ḥamīd. Bayrūt: Al-Maktabah al-'Aṣriyyah, 1999.
- Al-Ash'arī, Abū al-Ḥassan. *Risālah Istiḥsān al-Khawḍ fī 'Ilm al-Kalām*, ed. Muḥammad al-Waliyy al-Ash'arī al-Qādirī al-Rifā'ī. Bayrūt: Dār al-Mashāri' li al-Ṭaba'ah wa al-Nashr wa al-Tawzī', 1995.
- Al-Baghdādī, 'Abd al-Qāhir bin Ṭāhir bin Muḥammad, *Al-Farq bayn al-Firaq*. Ibrāhim Ramaḍān (pnyt.). Bayrūt: Dār al-Ma'rifah. 2001.
- Al-Baghdādī, 'Abd al-Qāhir bin Ṭāhir bin Muḥammad, *Usul al-Dīn*, ed. Ahmad Sham al-Dīn. Bayrūt: Dār al-Kutub al-'Ilmiyyah. 2002.
- Al-Baghdadi, Abd al-Qahir bin Tahir bin Muhammad, *Aqidah Ahli Sunnah Wal Jamaah Satu Pengenalan*. Terj. Ibrahim Abu Bakar.

- Kuala Lumpur: Yayasan Dakwah Islamiah Malaysia (YADIM). 1982.
- Al-Baghdādi, Abu-Manṣūr ‘Abd-al-Kāhir ibn Ṭāhir, *Moslem Schisms and Sects*. Terj. Seelye, Kate Chambers. New York: Ams Press Ins. 1966.
- Al-Baghdādi, Abu-Manṣūr ‘Abd-al-Kāhir ibn Ṭāhir, *Moslem Schisms and Sects Part II*. Terj. Halkin, Abraham S. Philadelphia: Porcupine Press Inc. 1978.
- Al-Bayḍawī, ‘Abd Allāh bin ‘Umar. *Ṭawāli‘ al-Anwār min Maṭāli‘ al-Anzār*, ed. ‘Abbās Sulaymān. Al-Qāhirah: Al-Maktabah al-Azhariyyah li al-Turāth. 1991.
- Al-Bayjūrī, Burhān al-Dīn Ibrāhīm bin Muḥammad, *Hāshiyah al-Imām al-Bayjūrī ‘alā Jawharah al-Tawḥīd al-Musammā Tuḥfah al-Murīd ‘alā Jawharah al-Tawḥīd*, ed. ‘Ali Jumū‘ah. Al-Qāhirah: Dār al-Salām. 2014.
- Al-Būṭī, Muḥammad Sa‘īd Ramaḍān, *Kubrā al-Yaqīniyyāt al-Kawniyyah: Wujūd al-Khāliq wa Wazīfah al-Makhlūq*. Dimashq: Dār al-Fikr. 1979.
- Al-Dawwānī, Jalāl al-Dīn, *Ta‘rīf ‘Ilm al-Kalām*, ed. Nizār Ḥammādī. Tūnis: Dār al-Imām Ibn ‘Arafah. 2017.
- Al-Ghazālī, Abū Ḥāmid Muḥammad, *Al-Iqtisād fī al-‘Itiqād*. Bayrūt: Dār al-Kutub al-‘Ilmiyyah. 1988.
- Al-Ghāzalī, Muḥammad bin Muḥammad, *Al-Munqidh min al-Ḍalāl wa al-Mufsiḥ bi al-Aḥwāl*. Bayrūt: Dār al-Minhāj. 2015.
- Al-Ghāzalī, Muḥammad bin Muḥammad, *Faḍā‘ih al-Bāṭiniyyah*, ed. ‘Abd al-Raḥman Badawī. Al-Qāhirah: al-Dār al-Qawmiyyah li al-Ṭabā‘ah wa al-Nashr. 1964.
- Al-Ḥaddād, ‘Abd Allāh bin ‘Alawī, *Dīwān al-Imām al-Ḥaddād atau al-Durr al-Manzūm lidhawī al-‘Uqūl wa al-Fuhūm*. t.tp.: t.p., t.t.
- Al-Hākīm, Abū ‘Abd Allāh Muḥammad bin ‘Abd Allāh al-Naysābūrī. *Al-Mustadrak ‘alā al-Ṣaḥīḥayn*. ‘Atā, Muṣṭafā ‘Abd al-Qādir (pnyt.). Jil. 1. Bayrūt: Dār al-Kutub al-‘Ilmiyyah. 1987.
- Al-Ījī, ‘Iḍḍ al-Dīn ‘Abd al-Raḥman bin Aḥmad, *Al-Mawāqif fī ‘Ilm al-Kalām*. Bayrūt: ‘Ālam al-Kutub. t.t.
- Al-Isfarāyīnī, Abū al-Muẓaffar Shāhfūr bin Ṭāhir bin Muḥammad al-Shāfi‘ī, *Al-Tabṣīr fī al-Dīn wa Tamyīz al-Firqah al-Nājiyyah ‘an al-Firaq al-Hālikīn*, ed. Muḥammad Zāhid al-Kawtharī. Al-Qāhirah: Al-Maktabah al-Azhariyyah li al-Turāth. 2010.

- Al-Jurjānī, al-Sayyid al-Sharīf ‘Alī bin Muḥammad, *Sharḥ al-Mawaqif wa ma‘ahu Ḥāshiyatā al-Sayālakūtī wa al-Ḥalabī*, ed. Maḥmūd ‘Umar al-Dimyāṭī. Bayrūt: Dār al-Kutub al-‘Ilmiyyah. 1998.
- Al-Kawtharī, Muḥammad Zāhid, “Iftirāq al-ummah ‘ala firaq.” dalam Al-Isfarāyīnī, Abū al-Muẓaffar. *Al-Tabṣīr fī al-Dīn wa Tamyīz al-Firqah al-Nājiyyah ‘an al-Firaq al-Hālikīn*. Al-Qāhirah: Al-Maktabah al-Azhariyyah li al-Turāth. 2010.
- Al-Mahdī, Aḥmad, *Sharḥ al-Mawāqif fī ‘Ilm al-Kalām: Al-Mawqif al-Khāmis fī al-Ilāhiyyāt*. Ḥadā’iq al-Qubbah: t.p. 1976.
- Al-Maltī, Abū al-Ḥusayn Muḥammad bin Aḥmad bin ‘Abd al-Raḥman, *Al-Tanbīh wa al-Radd ‘alā Ahl al-Ahwā’ wa al-Bida’*, ed. Muḥammad Zāhid al-Kawtharī. Al-Qāhirah: Al-Maktabah al-Azhariyyah li al-Turāth. 2007.
- Al-Mu‘jam al-Asāsī al-‘Arabī*. t.tp.: Al-Munazzamah al-‘Arabiyyah li al-Tarbiyyah wa al-Thaqāfah wa al-‘Ulūm. 2003.
- Al-Rāzī, Fakhr al-Dīn Muḥammad bin ‘Umar bin al-Ḥusayn, *Al-Riyād al-Mūniqah fī Arā’ Ahl al-‘Ilm*, ed. As‘ad Jum‘ah. Al-Qayrawān: Kulliyah al-Ādāb wa al-‘Ulūm al-Insāniyyah & Markaz al-Nashr al-Jāmi‘ī. 2004.
- Al-Rāzī, Fakhr al-Dīn Muḥammad bin ‘Umar bin al-Ḥusayn, *Tafsīr al-Fakhr al-Rāzī al-Mushtahir bi al-Tafsīr al-Kabīr wa Mafātiḥ al-Ghayb*. Bayrūt: Dār al-Fikr li al-Tabā‘ah wa al-Nashr wa al-Tawzī‘. 1981.
- Al-Sanūsī, Abū ‘Abd Allāh Muḥammad bin Yūsuf, *Rasā’il al-Imām Abī ‘Abd Allāh Muḥammad bin Yūsuf al-Sanūsī fī ‘Ilm al-‘Aqīdah ‘alā Manhaj al-Asha‘irah*, ed. ‘Abd al-Karīm Qabūl. Al-Maghrib: Dār al-Rashād al-Ḥadīthah. 2013.
- Al-Shahrastānī, Muḥammad bin ‘Abd al-Karīm, *Al-Milal wa al-Niḥal*, ed. Aḥmad Fahmī Muḥammad. Bayrūt: Dār al-Kutub al-‘Ilmiyyah. 1992.
- Al-Ṭabarī, Abū Ja‘far Muḥammad bin Jarīr bin Yazīd bin Kathīr, *Jāmi‘ al-Bayān ‘an Ta’wīl Ayy al-Qur‘ān*, ed. Bashshār ‘Awaḍ Ma‘rūf & ‘Iṣām Fāris al-Ḥaristānī. Bayrūt: Mu‘assasah al-Risālah. 1994.
- Al-Taftāzānī, Sa‘d al-Dīn Ma‘ūd bin ‘Umar bin ‘Abd Allāh, *Sharḥ al-‘Aqā’id al-Nasafiyyah*, ed. Aḥmad Ḥijāzī al-Siqā. Al-Qāhirah: Maktabah al-Kulliyāt al-Azhariyyah. 1987.

- Al-Taftāzānī, Sa'd al-Dīn Ma'ūd bin 'Umar bin 'Abd Allāh, *Sharḥ al-Maqāshid*, ed. 'Abd al-Raḥman 'Umayrah. Bayrūt: 'Ālam al-Kutub. 1998.
- Al-Tarmidhī, Abū 'Īsā Muḥammad bin 'Īsā, *Sunan al-Tarmidhī*, ed. Al-Aṭṭār, Ṣidqī Jamīl. Bayrūt: Dār al-Fikr. 2005.
- Al-Zabīdī, al-Sayyid Murtaḍa, *Ittiḥāf al-Sādah al-Muttaqīn*, Bayrūt-Lubnān: Mu'assasah al-Tārikh al-'Arabī. 1994M/1414H.
- Engku Ahmad Zaki Engku Alwi, *Ajaran Sesat: Mengenali Jalan Yang Terpesong*. Selangor: PTS Publication & Distributors Sdn. Bhd. 2007.
- Farahwahida Mohd Yusof, *Al-Arḡam & Ajaran Aurad Muhammadiyah: Satu Penilaian*. Johor Bahru: Universiti Teknologi Malaysia, 2007.
- Farahwahida Mohd Yusof, *Aliran Kepercayaan: Sejarah dan Perkembangannya Di Malaysia*. Johor Bahru: Universiti Teknologi Malaysia. 2007.
- Farahwahida Mohd Yusof, *Fatwa: Keberkesanannya Memerangi Ajaran Sesat Di Malaysia*. Johor Bahru: Universiti Teknologi Malaysia. 2011.
- Farahwahida Mohd Yusof, *Penyelewengan Ajaran Qadiani*. Johor Bahru: Universiti Teknologi Malaysia. 2008.
- Fawdah, Sa'īd 'Abd al-Laṭīf, *Buḥuth fī 'Ilm al-Kalām*. 'Ammān: Dār al-Rāzī li al-Ṭabā'ah wa al-Nashr wa al-Tawzī'. 2004.
- Hasan Mahmud al-Shafe'i, "Hakikat Ilmu Kalam: definisi, matlamat, metode, topik perbincangan dan kedudukannya dalam ilmu-ilmu Islam." Terj. Wan Suhaimi Wan Abdullah. *Afkar* 04(Mei). 2004.
- Ibn 'Asākir, Abū al-Qāsim 'Alī bin al-Ḥassan bin Hibbah Allāh al-Dimashqī, *Tabyīn Kazb al-Muftarī fīmā Nusiba ilā al-Imām Abī al-Ḥassan al-Ash'arī*, ed. Muḥammad Zāhid al-Kawtharī. Al-Qāhirah: Al-Maktabah al-Azhariyyah li al-Turāth. 2014.
- Ibn Kathīr, Al-Ḥāfiz 'Imād al-Dīn Abī al-Fidā' Ismā'il bin 'Umar al-Qurashī al-Dimashqī, *Tafsīr al-Qur'ān al-'Azīm*. Bayrūt: Dār Ibn Ḥazm. 2000.
- Ibn Khaldūn, Waliyy al-Dīn 'Abd al-Raḥman bin Muḥammad, *Muqaddimah Ibn Khaldūn*, ed. 'Abd Allah Muḥammad al-Darwīsh. Dimashq: Dār Ya'rab. 2004.

- Ibn Mājah, Abū ‘Abd Allāh Muḥammad bin Yazīdal-Rab‘ī al-Qazwīnī., *Sunan Ibn Mājah*. Al-Riyād: Dār al-Salām li al-Nashr wa al-Tawzī‘. 1999.
- Ibn Taymiyyah, Aḥmad bin ‘Abd al-Ḥalīm bin ‘Abd al-Salām, *Dar’ al-Ta‘āruḍ al-‘Aql wa al-Naql aw Muqāfaḥah Ṣaḥiḥ al-Manqūl li Ṣarīḥ al-Ma‘qūl*, ed. Al-Sayyid Muḥammad al-Sayyid & Sayyid Ibrāhīm Ṣādiq. Al-Qāhirah: Dar al-Ḥadīth. 2006.
- Jabatan Kemajuan Islam Malaysia (JAKIM), *Penjelasan Ciri-ciri Utama Ajaran Sesat*. Kuala Lumpur: Jabatan Kemajuan Islam Malaysia. 2010.
- Jumu‘ah, ‘Ali, *Al-Kutub al-Mukawwinah li al-Fikr al-Islamī (Al-Sunnī)*. ‘Ammān: Al-Markaz al-Malakī li al-Buḥūth wa al-Dirāsāt al-Islāmiyyah (MABDA). 2014.
- Jumu‘ah, ‘Ali, *Al-Kutub al-Mukawwinah li al-Fikr al-Islamī al-Sunnī*. Al-Qāhirah: Dār al-Ṣāliḥ. 2017.
- Kamus Dewan*, Edisi ke-4. Kuala Lumpur: Dewan Bahasa dan Pustaka. 2007.
- Khālid Zahrī, *Al-Maṣādir al-Maghribiyyah li al-‘Aqīdah al-Ash‘ariyyah*. Al-Maghrib: Markaz Abī al-Ḥassan al-‘Asharī li al-Dirāsāt wa al-Buḥūth al-‘Aqdiyyah. 2017.
- Mohamad Nidzam Abdul Kadir, *40 Ciri Ajaran Sesat*. Kuala Lumpur: Telaga Biru Sdn. Bhd. 2012.
- Mohd Radhi Ibrahim & Rawiyah Mohd Junoh. *Risālah fi al-istiḥsān al-khawḍ fi ilm al-Kalām* karangan Imām al-‘Ash‘arī: terjemahan teks. *Afkar* 04(Mei). 2003.
- Muhammad Ayman al-‘Akiti, Ahmad Faiz Hafizuddin Rosli & Muhammad Amir Ashraf Rosdin, *Shaykh ‘Abdu’llah Fahim: ‘Ulamā’ Ahl al-Sunnah wa al-Jamā‘ah dan Perjuangan Kebangsaan*. Kajang: Akademi Jawi Malaysia Sdn. Bhd. 2020.
- Muhammad Muktar bin Atarid, *Inilah Kitāb Uṣūl al-Dīn I’tiqād Ahl al-Sunnah wa al-Jamā‘ah*. t.tp.: Percetakan Nahdī. t.t.
- Muslim, Abī al-Ḥusayn Muslim bin al-Ḥajjāj bin Muslim, *Ṣaḥiḥ Muslim*. Al-Riyād: Dār al-Salām li al-Nashr wa al-Tawzī‘. 2000.
- Wan Haslan Khairuddin, “Abu al-Hassan al-Ash'ari mujaddid Ilmu Kalam” dalam *Prosiding Seminar Gerakan Islah dalam Dunia Islam: Pemikiran dan Pengaruh Abu al-Hassan al-Ash'ari dalam Masyarakat Melayu*, 2017.

- Wan Haslan Khairuddin, Indriaty Ismail & Abdull Rahman Mahmood. "Ilmu kajian agama-agama dalam tradisi Islam." *Akademika* 90(2). 2020.
- Wan Haslan Khairuddin. "Tema dan metode kritikan Raḥmatullāh al-Kayrānawī terhadap Bible berdasarkan kitab Izhār al-Ḥaq." Tesis Ph.D. Universiti Kebangsaan Malaysia. 2018.
- Wan Mohd Azam Mohd Amin, *Ajaran Sesat*. Kuala Lumpur: Penerbit Universiti Islam Antarabangsa Malaysia (UIAM). 2009.
- Zakir Naik. 2013. *Concept of God in Hinduism*. (atas talian) <https://www.youtube.com/watch?v=IT0Y2pw39fg> (17 Oktober 2017).
- Zakir Naik. t.th. *Concept of God in Hinduism*. (atas talian) http://www.irfi.org/articles2/articles_3301_3350/concept%20of%20god%20in%20hinduismhtml.htm (17 Oktober 2017).